



## Universitätsbibliothek Paderborn

### **V. P. Gasparis Druzbicki, Societatis Jesu, Opera Omnia Ascetica**

Aucta Duobus Opusculis De Effectibus, Fructu, Et Applicatione Sanctissimi  
Missæ Sacrificii, Et De Sublimitate Perfectionis Religiosæ. Catalogum  
Tractatum Asceticorum Omnium Vicina Post Dedicacionem Pagina  
Indicabit

V. P. Gasparis Druzbicki, Societatis Jesu, Fasciculus Exercitiorum Et  
Considerationum, De Præcipuis Veritatibus Christianæ Fidei Et Sapientiæ -  
Ad efformationem Christianæ vitæ, consecutionem salutis æternæ  
collectus: & usui accommodatus

**Druzbicki, Kaspar**

**Ingolstadii, 1732**

**VD18 90066332**

Exercit. 2. Quid sit Creatura?

**urn:nbn:de:hbz:466:1-45396**

## EXERCITIUM II.

*Quid sit Creatura.*

1. **S**Tatue te in conspectu DEI Unius in Trinitate, & Trini in Unitate: eo modo, quo S. Franciscus solebat sese constitüere, & in oratione DEI pernötare, sollicitissimâ humilitate, quæstiones has duas repetent, simulque recolens: (Quis tu? & quis ego Domine?) Quid sit Deus? jam in priore Exercitio vidisti: quomodo Nictico-races, Noctuæ, & Talpæ Meridianum solem videre solent. Quis sis, & quid sis Tu, jam vide.

2. Quid est Creatura? quod verius, plenius, adæquatus, responderi, & affirmari potest; est Nihil: qui Creaturam esse Nihil, dixit; dixit de eâ, deque totâ ejus Entitate, atque substantiâ, totum quod revera est: revera enim Creatura Nihil est. Non ens est, non est.

3. Opposito per omnia modo se habens ad Deum. Ut enim Deus est qui est: sic Creatura est quod Non est, seu Nihil est. Ut Deus est purum, primum, solidum, verumque Ens: sic Creatura est purum, putum, ac solidum merumque Nihil. Ut DEUS, est essentialis essentia, & essentialiter Ens, atque Existens: sic Creatura, essentialiter, & essentialiter est Nihil, & non ens, & non est. Ut Deus, ipsi sibi est fons & origo Essendi: estque id quod est, à semet, & ex semet, & semetipso: sic Creatura ipsa sibi est fons, & origo Nihili, & non essendi: & est id quod Non est: à semetipsâ, & ex semetipsâ, ac semetipsâ est Nihil, & Non ens. Ut DEUS, est suæ omnisque Essentiæ pelagus: sic Creatura est suæ omnisque  
Non

Non essentia, & Non entitatis & nihili pelagus. Ut Deus, quantumlibet sese exhauriat, exinaniat, & annihilat; tamen impossibile est, ut Non sit: ut Nihil sit: ut id quod Est, non sit: sic Creatura, quantumlibet entificetur, ex non esse extrahatur, in Esse perficiatur, atque compleatur, tamen impossibile est, ut Non sit Nihil: non maneatque Nihil: & non toto Nihili sui innati impetu proruat in Nihil.

4. Quemadmodum Aër iste, quo vivimus atque spiramus: etiamsi per tot jam annorum millia, singulis diebus à luce Solis, ita illuminetur, atque lumine penetretur, ut quasi ipsum lumen fiat; singulis tamen diebus, seu noctibus, ita totum lumen deperdit, adeoque sequenti mane ac die rursum illuminari indiget, ac si nunquam antea fuisset luce perfusus, aut penetratus; Ita Creatura, quantumcunque in aliquod Esse de suo Nihilo educatur, & fiat: quantumcunque perficiatur, compleaturque, quantumcunque solidetur, firmetur, corroboretur; Nunquam tamen, etiam per absolutam Omnipotentiam, ita à suo Nihilo excedit, extrahiturvé, ita perficitur completurvé, ita solidatur & obfirmatur, ut vel ad momentum per se in suo illo obfirmatissimo quamvis Esse, permanere possit: si Omnipotentia manus ab eâ recedat.

5. Quemadmodum lapis Molaris, sursum rudente appensus, impediri quidem ille potest retinaculo, ne deorsum ruat: tamen ne toto suo pondere deorsum tendat, inhiberi non potest: sed omni momento, quo retinaculum fuerit amotum deorsum præceps ruet; Ita Creatura potest quidem conservatrice Omnipotentia in

Esse.

Esse suo conservari, ne in suum Nihilum recidat: non potest tamen præpediri, quin in suum Nihilum primævum assiduò tendat: & quin a motâ conservatrice manu, in ipso momento, esse penitus desinat: & Nihil, quod fuit, imò quod est; evadat, & existat.

6. Huic suo Nihilo Creatura debet, carentiam omnis boni: quocunque caret, omni autem caret: & impossibile est, ut non careat: nisi illud Deus, à quo est; & cujus est; & qui est, omne bonum ipsi congruum; donet: & omni quidem prorsus momento donet.

7. Eidem suo Nihilo Creatura debet, annexionem sive emanationem omnis Mali, quocunque scetet: & est impossibile ut non scateat, si sibimetipsi relinquatur. Inde Creatura, v. g. Homo, quod non sit in rerum naturâ, suo nihilo debet. quòd sit homo non Angelus, suo Nihilo debet: quòd corpus habeat infirmum, fluxum, deficiens, morbis obnoxium; quòd circumscriptum certâ mole, loco, tempore, duratione vitæ brevi, & quibuscunque, aut defectibus, aut miseriis, suo nihilo debet. quòd cæcus, luscus, surdus, mancus, claudus, gibbosus, distortus sit, suo Nihilo debet. quòd talis quidem non sit, at esse potuit, esse potest, aut forsitan erit, hoc suo debet Nihilo: quòd non fuit ante natalem suum; quòd brevi non sit futurus; quòd omni momento possit non esse, suo nihilo debet. Procedatur hunc in modum per omnes conditiones cujuscunque sive Creaturæ, sive hominis, per bona, makave Corporis, Animæ, fortunæ: per bona naturæ; gratiæ, gloriæ: per mala naturæ, per mala moralia, per mala pænæ. Si homo

V. P. Druzb. Op. V.

B

bona

bona non habet; si habet sed amittere potest sicut reverà omni momento amittere potest imò quantum in illo est amittere laborat; suo nihilo debet. Si homo defectus habet, qualescunque illi sint; si non quidem habet, at omni momento habere potest, quin & quantum ex se, ad eos habendos tendit; suo id Nihilo debet. Quod autem, vel aliqua bona habeat, vel mala non habeat homo; non sibi, sed Creatori, & largitori omnium bonorum, amotori omnium malorum Deo, debet homo: & omnis alia Creatura, perinde ac homo.

8. Ex his, quæ satis modicè de Nihilo omnis Creaturæ delibata sunt, cognoscat omnis Creatura, & in specie omnis homo, quem sensuum in veritate habere debeat de se omnis Creatura: & in specie omnis homo.

## P R A X I S.

**C**onfitebor tibi Domine, Rex, & Pater celi, & terræ: quia docuisti me Nihilum meum quod ex me ipso sum, & quod non esse non possum. Ita Pater, hoc me de me nosse, & confiteri coram te placitum est ante te. Quia quidquid sum, quidquid possum, quidquid habeo boni, à te, ex te, per te, & per bonitatem tuam largitricem, sum, possum, habeo: quidquid etiam mali non sum, quod tamen esse potui, aut etiam fui, id etiam ex bonitatis tuæ procuratione habeo. Quidquid autem est in me, quidquid sum, quidquid esse possum, quidquid fui imperfectionis, defectus, cecitatis, infirmitatis, malitia, stultitiæ, perditionis, & omnis omnino miseriæ malignitatisque, ad omne malum conversionis, ab omni bono aversionis: totum hoc meum proprium est, mei Nihili

Nihil  
 & eg  
 quia  
 unive  
 lus, &  
 pecca  
 qua  
 nutri  
 me.  
 manu  
 qui te  
 tutis  
 conse  
 dona

I. S  
 narur  
 US r  
 cula.  
 2  
 à se i  
 est, u  
 jus si  
 admo  
 effi  
 ment  
 3  
 habe  
 aliqu  
 Crea

Nihili fructus, & emanatio est. Tu nosti Domine, & ego confiteor coram te, quia sum pulvis & cinis: quia canis mortuus: quia vanitas vanitatum, & universa vanitas: quia servus inutilis, piger & malus, quia filius mortis & perditionis, quia captivus peccati & diaboli, quia filius prodigus, quia Ovis quæ periit, quia in iniquitatibus conceptus, natus, nutritus, adultus sum, & non est auxilium mihi in me. Sed tu Domine, recordare, quoniam opus manuum tuarum sum, & homo infirmus, atque exigui temporis, magis etiam exigua, imo nullius virtutis, propterea dimitte mihi omnia delicta mea, & conservatibi in me omnia bona mea, quia ipsa sunt donata tua, pro quibus, benedictus sis in æternum.

### EXERCITIUM III.

*Quid sit Deus Creatura?*

1. **S**TATUE te coram Deo, in Unitate Essentiæ Trinoperonaliter, & in Trinitate personarum Uno essentialiter. Hic est DEUS, DEUS noster: ipse est DEUS, & reget nos in sæcula.

2. Adverte: quòd quoniam Creatura ex se, & à se ipsa, & sibi, nihil omnino sit: ideo necesse est, ut ab alio, & ex alio, & alicui, atque alicuius sit: ejus nempe, à quo habet ut sit: quemadmodum figmentum, quod ab alio effictum est, effictoris sui totum est, à quo habet, quod figmentum sit.

3. Creaturæ ex sese prorsus Nihil existenti, & habenti; nullum quoque jus ad hoc, ut saltem ab aliquo alio quidpiam habeat, obtinendi; Deus Creator est, non ex ullo suo ad Creaturam debi-